

Hi omnes vel maior horum pars feliciter constituta, insignem matris fortunam significat. Quod si male affecti fuerint, matrem miseram & afflictam morbis, aegritudinibus & alijs incommodis ostendunt.

Porro ex collatione significatorum patris & matris colligitur facile utriusque parentis status sit felicior futurus quo ad bona fortunae, corporis & animi. Cuius enim significatores fortiores erunt, eius status iudicandus est felicior, & maior futura aetas.

DE MUTUA CONCORDIA PARENTVM.

In diurna natiuitate considera Solem et Venerem, & iuxta eorum inter se configurationem de mutuo amore parentum iudica. Si enim Sol aspexerit Venerem benigno radio ut trigono aut hexagano, etiam coniunctione, concordiam & benevolentiam significat. Si vero quadrato aut opposito radio, aut si in separatis signis fuerint, hoc est, si prorsus nullus aspectus inter eos intercesserit, discordia & odium significatur. Et hoc malum erit vehementius si ex angulis se aspiciant hoc modo. Item quo partior fuerit aspectus eo maior concordia vel dissentio erit futura: quo magis platicus eo minor &c.

In nocturna genitura considera Saturnum & Lunam, & ex horum inter se configuratione eadem ratione de mutuo amore vel odio parentum iudica.

DE AMORE PARENTVM ERGA NATVM, & vter ex parentibus natum magis diligit.

Si significatores parentum supra constituti, benigno aspectu configurantur cum domino Horoscopi, amor & concordia inter parentes & natum futura est. Contra, si maligno aspectu. Atque inde etiam constabit vtrum pater vel mater magis diligit natum. Si enim significatores patris pro toto vel maiori parte benigne configurentur domino Horoscopi, Matris vero maligne, pater plus diligit natum quam mater.

EXEMPLVM PRIMAE GENITVRAE.

Significatores patris in hac genitura sunt.

- 1 Cuspis quartae domus, quam occupat Grad. 10. M. 12. Geminorum.
- 2 Mercurius dominus eius.
- 3 Sol naturalis significator patris in diurna genesi.

Primus horum significatorum fortis est omnino, Nam propter signum ipsum, deinde propter trinum Veneris & Sextilem Iouis dextrum, Item terminum benigni planetae & radio Solarium absentiam, 17. testimonia fortitudinis habet. Debilitatis tantum 4. propter oppositum Saturni aspectum.

Secundus itidem fortissimus est, ut supra ostendimus.

Tertius mediocris.

Cum igitur significatores maiori ex parte fortes sint & fortunati, ostendunt patris fortunam magna ex parte secundam futuram. Sed Solis in extremo gradu Leonis constitutio, & Saturni oppositus ad quartam, omnia tamen ornamenta facit imbecilliora &c.

Significatores matris in hac genesi.

- 1 Gradus 10. M. 12. Sagittarij occupans initium decimae domus.
- 2 Iuppiter eius dominus.
- 3 Venus naturalis significatrix matris in diurna genesi.
- 4 Saturnus constitutus in decima.

Primus horum significatorum fortis est, sed praesentia Saturni incommodat ei.

Secundus mediocriter constitutus. Tertius fortis. Quartus similiter potens.

Ergo cum maior pars significatorum matris sit bene constituta, statum maiori ex parte prosperum decernit. Neque tamen omnino deerunt incommoda quaedam animi et corporis, propter Saturnum in medio caeli, & Iouem in loco abiecto, & Martis ad eum malignum aspectum.